

LIS PREDICJIS DAL MUINI

di pre Josef Marchet - Udin, 1965

La stue

Copari Michêl, za che tu sês in piis, fâs il plasê di tirâ dongje chê mostre di puarte; se no, chês femenutis culî si sgrisulin di frêt e Diu nus vuardi che no ur vegni une ponte! Sintît ancje cheste: chê altre di siôr Noni Tabarin, che o sin stâts compagns di banc ae scuele publiche, mi à mandât de Americhe cuatri carantans pe glesie: cussì o varès pensât di fâ meti une biele stue, culî in bande, se ogni famee - di chês che a vegnin in glesie, si capîs - si impegnàs di puartâ, in volte, un braç di lens o un fassut di vinceis ogni fieste. Si tratarès di un cuindis fiestis ad an, che fûr dai mê s crûts nol covente fâ fûc.

Une robe gnove - no mo? - adatade al fisic delicât di chê int di cumò. Parcè che mê comari Tunine dal Fari e gno cusin Pierot Raspan e Sepil Brumat e la vedue Tencje mi àn vût dit che lôr a vignaressin di plui in glesie se no fos chê glacere che e je, massime cuant che pre Scjefin al distire masse il so sermon. Magari gno cusin Pierot il dì di San Silvestri o di San Valantin al sta, come nuie, cuatri oris fer inte criure sul marcjât di Gargagnà di Sot, se al è ogni pôc di rizîr di animâi. Magari Tunine dal Fari, il prin viaç che e fâs di buinore a aurî aghe sul poç, se si cjate cu la Catine dal Moro, almancul mieze ore di tabaiade la pete dal sigûr, cui piis sul lastron de glace che al è alî ator. Magari Brumat al resist mieze zornade, intes primis zilugnadis di

Atom, a tignî a ments lis vuiscjadis che al à tindudis inte pinade dal Blancutin. Il pericol di cjapâ la polmonite al è dome in glesie, dulà che no cole la zilugne, dulà che no sofle la buere, dulà che la glace no si imbrucjis nancje inte piere de aghe sante, che e je simpri distaponade.

Po ben, o provarai a meti sù la stue; e la metarai ca sù insom, cu la sperance che, tratantsi di sintî clip, ancje chei fantats che a son solits di fermâsi subite dentri de puarte, a vebin di scomençâ a vignî plui indenant. Se no ju tire il vanzeli predicjât dal predi, ju tirarà il boreç.

Tu, Martin di Sante, che tu sês un bon cristian (cuant che ti salte), tu vignarâs a fâmi il cjamin: za di cheste stagjon no tu âs altris lavôrs di muridôr pes mans. Al vûl dî che il bocâl par umiliâ la agatorie no ti mancjarà: che jo o sai di ce pît che tu vâs çuet. Chel fregul di materiâl che ti coventarà, al sarà culî martars cu ven; o mi soi bielzà intindût cul mulinâr che lu meni dongje.

Cjo mo: a moments mi dismenteavi di visâus che doman o varin la messe aes vot e mieze; e dopomisdì nuie, parcè che inte plêf e je la novene di Sant Blâs. Cussì ancje lunis, che e je fieste, lis funzions a saran dome là jù. Al dîs il plevan che, di cheste stagjon, un quart di ore di strade al va benon. E cun cheste us doi la buine sere.